

# عندك الحق

حجة طول طول



عندك الحق

# عندك الحق

ـجیة طول طول

ـجیة طول طول

تستعرض لكم دار نسمات الأدب للنشر

الإلكتروني بعزيمة وإبداع جديد

الكتاب : خواطر

المؤلف: سجية طول طول

غلاف الكتاب: سمر حمدان

موك اب الكتاب: ملك البقري

تنسيق داخلي: منار محمد

إدارة الدار: رزان محمد كليب

مع نسمات الأدب، أفكارك تنبض بالحياة!

[نسمات الادب للنشر الإلكتروني](#)

## الاهداء

إلى اللي قرا وكشف الأسرار، إلى اللي  
حسن بكلامي ودار...

يا اللي قرئت وعيونك حكاو، وعقلك  
سرح في ليام وفات، يمكن كلامي دواك  
وشفاك، ويمكن زادك جرح وسكات...

نعرفك مليح، يا اللي سهرت، تحسب في  
نجوم بلا ردة، كم مرة ظلمت روحك  
وسكت، وكم مرة عندك الحق وما  
حدة...

بصح الدنيا دورات تدور، وكل كلمة حق  
عندها نهار، ما تخلّيش الظلم فيك يخوّر،  
وآمن بروحك رغم العثار!

عندك الحق تعيش وتكون، عندك الحق  
تحلم وتطير، عندك الحق تبدل الكون،  
وتخلي بصمتك فالدنيا تسير!

المقدمة

إلى اللي قرا هذا الكتاب، يمكن تكون  
 قرئتو بفضول، ولا صدفة، ولا يمكن  
 قلبك كان يحتاج يسمع كلمة حق تريح  
 بالك كيما أنا كنت نحتاج نهدر ونعبر.

نعرفك، نعرف بلي عديت ليالي طويلة  
 وانت تفكر، ظلموك مرات، حسّوك غالط  
 وانت عارف بلي عندك الحق، ضحكت  
 بزاف باش تخبي وجعك، وسكتت في  
 وقت كنت لازم تهدر، وتكلمت في وقت  
 ما سمعوكش، نعرف بلي مرات حسّيت  
 الدنيا ثقيلة، وأنو تعبك راح هباء، وأنك  
 ما لقيتش اللي يقولك: "عندك الحق!"

بصح شوف، لو كنت هنا اليوم، وقرئت  
 هاد الكلمات، معناتها روحك مازالت



قوية، وما زال عندك أمل، وما زال  
عندك حاجة تحارب عليها!

ما تخليش حتى حد يقولك وش تقدر  
تدير ولا لا، ما تخليش حد يطفى النور  
اللي فيك، وما تخليش الأيام تفوت بلا ما  
تخلي بصمتك لأنك عندك الحق!

عندك الحق تعيش بطريقةك، تغط،  
تتعلم، تضحك بصوت عالي، تبكي بلا ما  
تخجل، تطيح وتوقف، تفشل وتعاود  
تحاول، عندك الحق تكون أنت وبس!

## عندك الحق يا يما...

### بصح كنا صغار وما فهمناش!

يا يما قدام وجهك اللي فيه تعب السنين،  
وقدام نظرتك اللي دايمًا شائلة همنا.

اليوم نحب نقولك: عندك الحق!

عندك الحق في كل نصيحة قلتيها، في  
كل مرة نطقني بـ "ماشي وقتها" وإحنا  
كنا نحسبوها ظلم.

عندك الحق كي قلتي "ما ترفدش الخير  
وتدييه للناس اللي ما تعرفش قيمتو"،  
وإحنا كنا نلوموك على قساوتك، وإنتي  
كنتي تحميننا من الوجع اللي كنا ما  
نعرفوش اسمو.



كنا صغار، والصغار يا يما، يشوفو الدنيا  
وردية، ما يعرفوش أنو فوسط الورد  
شوك، ما يعرفوش أنو الطيبة الزايدة  
تولي ضعف، وأنو مش كل الناس  
يستاهلوا القلب الأبيض.

كبرنا وشفنا، شفنا كيف كلامك اللي كنا  
نرفضوه، كان درع، كان جدار يحمي  
قلوبنا من الانكسار، شفنا كيف حنيتك  
اللي خبيتيها فالكلام القاسي، كانت  
أصدق من ألف حزن زائف.

تذكرتك كي قالولي "ماشي لازم تكوني  
طيبة دائماً"

وتذكرتك كي بكيت من ناس عطيتهم  
أكثر من روعي.

آه يا يمالو يرجع الوقت، كنت نسمعك،  
كنت نحضنك كل ما قلتي "ردي بالك".

كنت نوقف ونقولك: عندك الحق يا يمال،  
إحنا اللي ما فهمناش!

من هذا القلب اللي تعب نقولك:  
سمحي لي، وتعيشي وتشوفي، وتشوفي  
فيا الراس اللي يفتخر بيك، الأم اللي  
علّمتني المعنى الحقيقي للحكمة، حتى لو  
جات في شكل قسوة.

عندك الحق، يا تاج راسي.

## عندك الحق

### بصح الدنيا عندها حقها زادة!

ياخي الدنيا غريبة... نهار تعطينا،  
ونهار تخلينا بلا زاد، نهار تحسّك ملك،  
ونهار تذكّ قدام اللي ما يسواش، نهار  
تحلفك بالخير، ونهار تضحك عليك من  
تحت لفوق.

عندك الحق كي تقول "الدنيا ظالمة"

بصح الحقيقة... الدنيا عندها حقها  
زادة!

عندها حق تكون هكا، متقلبة، متغيرة،  
فيها الضحكة وفيها الدمعة، لأنها لو  
كانت سهلة، ما كناش رح نعرفوا قيمة  
الحاجات اللي بين يدينا، ولو كانت دائما

معاننا، ما كناش رح نتعلموا كيف نقفوا  
وحدنا!

مرات نحسّوها قاسية، نخسرو، نطيحوا،  
نتوجعو

نقولوا "واش هاذ الدنيا اللي ما  
ترحمش؟!!"

لكن بعد سنين نرجعوا لنفس اللحظة،  
ونفهموا بلي كلش كان لازم، لازم تطيح  
باش تعرف قيمتك، ولازم تخسر باش  
تفهم وين الصح!

الدنيا مش ظالمة.

الدنيا معطية دروس، وإلا كان الواحد  
يقدر يقرأ الدرس من غير ألم، كان رح  
يعيش بسلام، بصح الإنسان عنيّد، لازم

يتوجّع باش يفهم، ولازم يخسر باش  
يقدر!

فإذا كنت اليوم زعلان على الدنيا، إذا  
كنت تحسّ بلي ظلمتك وسدّت عليك  
البيان، اصبر.

نهار تفهم الدرس، رح تلقى باب مفتوح  
مكان ما كنت شايف ظلام  
ورح تقول كيما قلت اليوم: عندك الحق،  
بصح الدنيا عندها حقها زادة!

## عندك الحق تزحف...

### می واش راح تستفاد؟

ماشي ساهل كي يجيك الظلم ويقطع  
روحك، ماشي ساهل كي تلقى تعبك راح  
هباء، كي تلقى الناس اللي عطيتهم  
روحك، ما قدروش حتى ظلك!

تزحف... طبعي!

تحس بالقهر... مفهوم!

تحب تفجر الغضب لي فيك... من حقاك!

بصح واش راح تستفاد؟!

هل غضبك رح يرجع الحق؟ هل دموعك  
رح تغير الناس؟ هل زعافك رح يعوضك  
على اللي راح؟

لا، ما راح يبذل والو!



بل بالعكس، الغضب كي النار، يحرق  
فيك قبل ما يحرق اللي ظلموك، يزيد  
عليك الهم، يزيد عليك التعب، يزيد عليك  
حسرة ما تنفك في والو!

لو كان تعرف قيمة الصبر، رح تفهم بلي  
الدنيا تاخذ وتعطي، ولو كان تعرف قيمة  
النسيان، رح تفهم بلي الزعاف خسارة  
طاقة.

تقدر تستعملها في حاجة تستاهل! فكيما  
تقول الحكمة: "ما تخلص اللي أذاك،  
يعيش في راسك بلا كراء!" خليه،  
سامح، تجاوز، وكمّل طريقك لأن الحياة  
مشي للوراء، والحكمة مشي في  
الغضب، الحكمة في كيفاش تستفيد من  
الوجع، بلا ما تخليه يأكلك!

عندك الحق تزحف... مي واش راح  
تستفاد؟!

## عندك الحق وما فهموكش...

### بصح العيب فيهم ولا فيك؟

أقسى شعور فالدنيا؟

مش أنك تكون غالط لا، لأن الغلط  
يتصلح!

المصيبة هي كي تكون صحّ، وتلقى  
روحك وحدك، وما يسمعوكش!

تحاول تهدر، تحاول تشرح، تحاول  
تفهمهم.

بصح يقابلوك بالرفض، بالسخرية،  
بالعيون اللي تقولك: "أنت غالط، حتى  
لو كنت على حق!"

علاش؟

لأنهم ما يبغوش يسمعوا، لأنهم يحبوا  
يعيشوا في راحتهم، وما يبغوش اللي  
يهزهم منها.

لأنهم تعودوا على "الصحّ المزيف"، وما  
يقدروش يواجهوا الحقيقة اللي قلتها.

بصح السؤال هنا: العيب فيهم، ولا فيك؟

إذا كنت إنسان عندو مبادئ، عندو  
أفكار، عندو نظرة مختلفة، والمجتمع  
رفضك، الناس بعدوا عليك، معاناتها  
عندك نعمة ما يدركوهاش.

نعمة أنك حرّ، وراسك مشي عبد للأفكار  
الجاهزة!

بصح حذاري.

لازم دايما تراجع روحك، لأنك إذا كنت  
كل مرة تلقى روحك وحدك.

كل مرة تقول "أنا اللي فاهم وهم  
الغالطين"، يمكن المشكلة ماشي فيهم.

ويمكن المشكلة فيك!

لأن الحق وحدو ما يكفي، لازم تعرف  
كيف توصلو، كيف تقنع، كيف تخلي  
كلامك يدخل للعقل قبل القلب.

وإذا بعد كل هاد المحاولات، مازالوا ما  
فهموكش.

روح، وابحث على ناس تفهمك.

لأنهم موجودين، حتى لو كانوا بعيدين!

عندك الحق وما فهموكش بصح مش  
دايما العيب فيهم، مرات لازم تشوف  
روحك زادة!



## عندك الحق تعاود المحاولة

### الحياة ماشى ضربة وحدة!

حلمت وفشلت، حاولت وخسرت، بنيت  
وتهدم كلشي قدام عينيك!

تحس روحك تعبت؟ ....طبيعي!

تحس بلي خسرت الوقت؟ .....مفهوم!

تحس بلي خلاص... ما عندكش قلب  
تحاول من جديد؟

بصح هنا الغلطة اللي يطيح فيها  
الناس: يحسبو الحياة سباق ضربة  
وحدة!

أما الحقيقة... الحياة سلسلة من  
المحاولات، كل وحدة أقوى من اللي  
قبلها.

ما كانش حاجة تجي من المحاولة الأولى.

الطفل ما يجريش من أول نهار، يطيح ألف مرة قبل ما يوقف، العصفور ما يطيرش من أول تجربة، لازم يتخبط شوية قبل ما يرتفع، والناجح ما ينجحش بلا ما يذوق طعم الخسارة.

الخسارة مشي النهاية، الخسارة درس.

تعلمك شكون تاق فيك وما كانش يستاهل.

تعلمك وين كنت غلط، وين لازم تحسن.

وتعلمك حاجة وحدة: إذا عندك نفس تحاول، معاناتها ما زال عندك فرصة تربح!

فما تخلّيش تجربة واحدة تحدد مصيرك،  
ما تخلّيش سقوط واحد يقرر مستقبلك،  
لأن الفرق بين الإنسان اللي يوصل  
واللي يبقى بلا هدف.

هو: اللي يوصل... ما وقفش فالنص!

عندك الحق تعاود المحاولة، الحياة  
ماشي ضربة وحدة!

## عندك الحق تضحك...

### الدنيا مسرحية بلا نص!

ياخي الدنيا غريبة... ناس تجي، ناس  
تروح، أحداث تتكرر، واللي ضحك  
البارح، اليوم يبكي، واللي كان فوق  
المسرح بطل، اليوم ولى مجرد متفرج.

حياتنا كي المسرحية، بصح الفرق؟

المسرحية عندها سيناريو مكتوب، أما  
الدنيا... تلعب فينا بلا نص، بلا تخطيط،  
بلا سابق إنذار!

كي تبكي، يقولوك: "صبر، الدنيا هكا!"

وكي تضحك، يقولوك: "خفف، الدنيا ما  
يدوم فيها والو!"

بصح الحقيقة؟ عندك الحق تضحك!

حتى لو كان قلبك مثقل بالهموم، حتى لو  
الناس ما تفهمكش، حتى لو كي تضحك،  
يسفسيك الواحد: "علاه تضحك؟"

كأن الضحك جريمة!

اضحك، لأنك ما تعرفش شحال باقي لك  
في هاذ المسرحية.

اضحك، لأن الضحك دواء، وحتى لو ما  
يداوي الجرح، على الأقل يخليه يوجع  
أقل.

اضحك، لأنك تستاهل لحظات فرح، حتى  
لو كانت مؤقتة.

اضحك، لأنك ما جبتيش الهم للدنيا، باش  
تزيد تعيشها كيما تبغي هي!

## عندك الحق

فكيما قالو: "عيش نهارك، كأك بطل  
المسرحية، وما يهكش التصفيق، المهم  
تكون راضي على الأداء!"

عندك الحق تضحك لأن الدنيا أصلا  
مسرحية بلا نص!



## عندك الحق تطيح...

### بصح الزين اللى يعاود يوقف!

ما كانش واحد ما طاحش فهاد الدنيا، ما  
كانش واحد ما خسرش حاجة كانت  
عندو غالية، ما كانش واحد ما حسّش  
روحو مرة مهمّش، مكسور، بلا قيمة...

بصح الفرق بين الناس؟

واحد يطيح ويبقى تحت، وواحد يطيح  
ويعاود يوقف! الناس اللى وصلوا  
للقمة، مشي لأنهم ما طاحوش، بالعكس.

طاحوا ألف مرة، تعرضوا للخيانة،  
فشلوا، شكّوا في رواحهم، بصح الفرق؟  
ما استسلموش!

عندك الحق تطيح.

عندك الحق تبكي، تحس روحك ضعيف،  
تحس بلي الدنيا ضدك، بصح كي تكمل  
لحظة الضعف، كملها بحركة وحدة:  
وقف على رجلك من جديد!

لأن الوقوف بعد السقوط، هو اللي يفرّق  
الناجح عن الفاشل، هو اللي يثبت بلي  
عندك قيمة، عندك صبر، عندك إرادة،  
هو اللي يقول للدنيا: "تقدري تطيحيني،  
بصح ما عمرك رح تخليني نبقي تحت!"  
عندك الحق تطيح... بصح الزين اللي  
يعاود يوقف!

## عندك الحق

مى برك كون صبور، الدنيا فيها دورات!

ياخي كيما الدنيا تدور، كيما الأيام تمر،  
الفرح يجي ويغيب، والحزن يروح  
ويرجع من جديد.

كل حاجة فيها دورة، وكل لحظة فيها  
بداية ونهاية.

لكن، الفرق بين الصبر والاندفاع، هو  
أنو الصبر يعلمك كيف تصبر، كيف تفهم  
أنو كل شيء في الحياة جاي وقتو.

الدنيا فيها دورات، وللازم تعلم كيف تكمل  
فيها.

في وقت الفرح، ما تكبرش فرحتك  
بزاف، لأنو الفرح يجي وقت، ويروح،

وفي وقت الحزن، ما تستسلمش له،  
لأنو الحزن يتبدل، ويتحول مع الزمن.

لو كنت صبور، رح تشوف الأمور من  
زاوية مختلفة، وتفهم بلي كل حاجة  
جاية في وقتها.

الصبر مشي ضعف، الصبر قوة.

اللي يصبر على الألم، يصبر على  
الخيبة، يصبر على الغربة، هو اللي  
يقدر يحقق أهدافه في النهاية، لأنه ما  
استسلمش للي جابوه ليه.

كل شيء يمر ... لكن ما يمرش إلا بلي  
يتعلم كيف يصبر!

عندك الحق، مي برك كون صبور، الدنيا  
فيها دورات!

## عندك الحق تبدل...

### می تبدل للأحسن ماشی العكس!

الإنسان مشي ثابت، ولا الدنيا كاتوقف  
على نقطة وحدة.

الناس تتغير، الظروف تتبدل، والأفكار  
تتحول.

لكن، مش كل تغيير هو خير!

واش معناه؟

بعض الأحيان، نحبوا نبدلوا حياتنا،  
نغيروا ظروفنا، بصح لازم نكون واعيين  
أن التغيير لازم يكون للأحسن.

ما تجيبش التغيير اللي يرجعك للخلف،  
ولا التغيير اللي يزيدك همّ فوق همك!

عندك الحق تبدل، ولكن خلي التغيير  
يكون في الاتجاه الصحيح، تبدل نحو  
الهدوء، نحو الفهم، نحو النجاح، نحو  
الحب.

ما تغيرش كل شيء بسبب لحظة  
غضب أو لحظة إحباط.

التغيير اللي تريده لازم يكون عنده  
هدف، لازم يكون نحو الأحسن، نحو  
المستقبل.

لو كنت فشلت مرة، أو حسّيت بلي  
ماشي فمكانك، اعرف أنو التغيير  
الحقيقي هو التغيير اللي يخليك تكتشف  
نفسك بشكل جديد.

مش تغيير يضيعك ويخليك تبعد عن  
أحلامك.



عندك الحق تبدل... مي تبدل للأحسن  
ماشي العكس!

## عندك الحق تسكت...

### بصح مرات الهدرة حق لازم يتقال!

السكوت في وقت الغضب... شيء حكيم

السكوت في وقت الضعف... شيء آمن

السكوت في وقت الخيانة... شيء

ضروري

لكن، مش كل السكوت حكمة!

مرات، السكوت هو أقوى أسلحة الظلم!

إذا كانت الدنيا تضغط عليك، والناس

يحكوا عليك، وما تقدرش ترد عليهم،

لأنك في موقف ضعيف، اعرف أنه

السكوت أحياناً هو الحل، لكن، في مرات

أخرى...

الهدرة تكون حق، وتستحق أن تتقال!

ما تخلص الناس يظلموك، ما تخلص  
أفكارك تظل محبوسة في قلبك، إذا كان  
عندك حق، إذا كان عندك فكرة، إذا كان  
عندك كلمة تقدر تغير كل شيء، لازم  
توصلها!

ما تخافش من الحقيقة، مهما كانت  
قاسية. الهدرة، كي تكون من القلب، ما  
تتخافش منها.

عندك الحق تسكت... بصح مرات  
الهدرة حق لازم يتقال!

## عندك الحق تعيط...

### بصح ما تخليش الدمع يعميك!

كي تضيق بيك الدنيا

كي تحسّ روحك محبوس، ما لقيتش  
وين تروح.

كي الكلمة تعجز، والمواقف تخون.

عندك الحق تعيط... ومن القلب!

ماشي عيب تبكي، ماشي ضعف كي  
تنزل دموعك، لأن الدمع يطهر، يخفف،  
يخرج الوجع اللي مخنوق فيك.

بصح ما تخليش الدمع يعميك!

ما تخليش الحزن يغطي الحقيقة، ما  
تخليش الألم يخليك تنسى شكون راك،

وما تخلّيش لحظة وجع، تدمر سنين من  
الصبر!

الدمعة ما تدومش كيما الضحكة، كيما  
كل شيء في الدنيا.

هي موجة وتعدّي، والمهم شكون تبقى  
من بعد ما تجف!

ما تخلّش من دموعك، بصح ما  
تعيشش فيها، خليه تخرج، بصح بعدها  
امسحها وكمّل، لأن الحياة تستنى اللي  
يوقف، ماشي اللي يغرق في دموعو.

عندك الحق تعيط... بصح ما تخلّيش  
الدمع يعميك!

## عندك الحق تكره...

### بصح ما تخلّيش الكره يحكم حياتك!

وش نقولوا ؟

الناس تغدر، الخيانة توجع، الظلم يحرق، وكى تمر بكل هاد الشى، طبعي يجي فخاطرك تكره...

تكره شخص، تكره موقف، تكره حتى نفسك على الضعف اللي عشته!

بصح الكره كى النار، تحرق كلشي حتى القلب اللي يشعلها!

تدريجياً، يبدأ ياكل فيك، ما يخلّيكش تعيش، ما يخلّيكش تهنى، ويولي كلشي فحياتك مبني على فكرة وحدة: الانتقام أو الحقد.

عندك الحق تكره، ماشي لأنك شرير، بل  
لأنك تأذيت.

بصح لازم توصل لمرحلة تقول فيها:  
"أنا نستاehl نعيش بلا ما نحمل قلبي  
بالسم!"

خلي الكره يمر، ما تحاربو بالقوة،  
حاربو بالسلام اللي تبنيه داخلك،  
بالصفحة الجديدة، بالمكان اللي يكون  
فيه قلبك خفيف.

الكره ما يغير الماضي، ما يشفيك، ما  
يعوضك...

بالعكس، يمنعك تشوف الجاي، ويحبسك  
في لحظة ما تستاهلكش.

عندك الحق تكره... بصح ما تخلّيش  
الكره يحكم حياتك!

## عندك الحق تتعب...

### بصح ما تنساش علاش بديت!

آه يا الدنيا...

تخلينا نركضو، نطبحو، نعاودو نوقفو،  
وفي نص الطريق، التعب يضرب،  
يوقفنا، يخلي عقلنا يقول: "كفاية...  
ماقدرتش!"

وأنا نقولك:

عندك الحق تتعب، عندك الحق تنهار،  
تحس الدنيا ثقيلة، تحس بلي الجهد اللي  
درتو راح هباء، وما وصلتش للي كنت  
تحلم بيه!

بصح، رجع روحك شوية للورى، وتفكر  
علاش بديت؟



تفكر اللي خلاك تقاوم، اللي خلاك  
تصبر، تفكر الدموع اللي بكيتها،  
والدعاوي اللي دعيتها، تفكر في روحك  
كي كنت تحارب، وما كانش حد معاك،  
وما زلت وقفت على رجلك!

لو تعبت... ريح، بصح ما توقفش.

لو نزلت دمة... امسحها، بصح ما  
تعيش فيها.

لو حسيت روحك ضايع... ذكر نفسك  
بالطفل اللي كنت.

اللي كان يشوف الدنيا بسيطة، ويقول:  
"غدوة نولي حاجة كبيرة!"

ما تخيبش هداك الطفل!

ما تخلص التعب يدفئك، خليه يدربك،  
يقويك، يخليك تفهم بلي النجاح ماشي  
ساهر، وبلي انت مشي أي واحد...

انت شخص ربي زرع فيه حلم، ومعا  
زرع الصبر باش توصل ليه!

عندك الحق تتعب... بصح ما تنساش  
علاش بديت!

## عندك الحق تخاف...

### بصح ما تعيشش عبد للخوف!

الخوف؟

ذاك الإحساس اللي يجيك في الليل، وين  
كلشي ساكت، بصح في داخلك... حرب.

الخوف من الفشل، من الرفض، من  
الوحدة، من الغد، من نفسك حتى!

آه... عندك الحق تخاف.

راك إنسان، والقلب اللي يحس، يخاف.

راك تعيش في عالم قاسي، واللي يحن  
ماشى دايماً ينجو، واللي يصدق يتكسر،  
واللي يحلم يُستهزأ به.

الخوف طبيعي، لكن...

الخطر كي يولي الخوف هو الحاكم!

كي كل قرار في حياتك يولي مبني على:

"وش لو يفشل؟"

"وش لو يخسرني؟"

"وش لو ضيعت كلشي؟"

هنا... انت ماكش عايش، انت رهينة.  
رهينة لأفكار ما صراتش...

رهينة لاحتمالات قتلتك قبل ما تولي  
حقيقة!

واجه الخوف، مشي بلاش، بل رغمًا  
عنه!

روح واحكي قدام الناس وانت ترتجف،  
اعترف بمشاعرك وانت تخاف من الرد،  
ابدأ مشروعك وانت تشك في نفسك،  
واكتب، غني، ارسم ....

حتى لو عقلك يقول:

"راك مش قدها!"

جاوبو:

"ما يهمش... راح نحاول!"

الخوف ما يمشيش... بس يضعف قدام  
الخطوة الأولى

الخطوة اللي تقول: "أنا ماشي عبد  
للخوف، أنا سيد نفسي!"

عندك الحق تخاف... بصح ما تعيشش  
عبد للخوف!

عندك الحق تشك في روحك...

بصح ما تطيحش قيمتك بعينيك!

آه يا خويا، يا أختي...

الناس يمدو فيك مية رأي

واحد يقول: "ماكش قدها"

واحد يضحك على طريقتك، واحد يخليك

تحس بلي وجودك ما يفرقش...

ووسط كل هاد الصخب... تبدأ تشك في

روحك.

"هل نقدر؟"

"هل نستاهل؟"

"هل أنا كافي؟"

وصدقتي، الشك ماشي العيب...

الشك هو ذاك الصوت اللي يقول:  
"حذر، راجع، صحح."

بصح....

يولي خطر... كي يولي يهدمك، انت  
بدل ما يبنيك.

يولي مرض... كي تعيش فيه، وتولي  
تشوف روحك ناقص، وتتسى بلي قيمتك  
ما عمرها كانت مربوطة برأيهم، ولا  
بلحظة فشل، ولا بكلمة جارحة!

قيمتك فقلبك، في مبادئك، في الصبر  
اللي درتو، في المعارك اللي مداها حد  
ما شافها.

قيمتك فالدمعة اللي خبيتها، والابتسامة  
اللي مديتها رغم الألم، قيمتك فالأمل

اللي مازلت تشعلو كل صباح، حتى وانت  
ماكش شايف الضوء!

أقسم بالله، لو تشوف روحك بعيوني،  
تبكي من قيمة اللي فيك!

راجل ولا مرأة، شاب ولا طفلة، كبير ولا  
صغير...راك نعمة!

نعمة في حضورك، في مشاعرك، في  
أفكارك، في المحبة اللي تقدر تزرعها.

ما تخلّيش العالم يقيسك بمقاييس ما  
تصلحكش، ما تخلّيش "النجاح"  
عندهم، يخليك تحس بالفشل، لأنك كيما  
الجبيل، حتى لو ما وصلتش للقمة...

راك صامد، واقف، عظيم!



عندك الحق تشك في روحك... بصح ما  
تطيش قيمتك بعينيك!

## عندك الحق تحس روحك وحدك...

### بصح رايك مش وحدك كما تحس!

فوسط الزحمة، تقدر تكون ضايع، وسط  
الضحك، قلبك ساكت.

وسط الناس، تحس روحك شفاف، كاين،  
بصح ما كاينش!

تعيدي نهاريك ورا الناس، تضحك،  
تجاوب، تهدر، بس في داخلك... صمت  
تقيل، وجع ما يتفهمش، ووحدة تعصر  
فيك.

وتولي تقول مع روحك: "أنا برك كاين  
وحدي فهاد العالم؟"

والجواب؟

لا، راك مش وحدك، راك مش غريب،  
راك مش منسي.

راهي كايئة قلوب تحس بيك، حتى لو ما  
هدراتش.

كاين ربي يسمعك وانت ساكت، يشوفك  
وانت تكذب الابتسامة، ويعرف التعب  
اللي فيك أكثر من اللي معاك يوميًا.

الوحدة ماشي دايمًا نقص ناس... مرات  
هي نقص حزن صادق، نقص فهم،  
نقص سؤال: "واش بيك؟"

ونقص قلب يسمعك بلا ما يحكم عليك.

بس اسمحلي نقولك:

ماشي لأنك وحدك اليوم، معناها ما  
تستاهلش الحب.

ماشي لأنهم ما فهموك، معناها كلامك ما  
عندوش معنى.

ماشي لأنك ساكت، معناها ما عندكش  
قيمة.

الوحدة تولي سلاح كي تتعلم تعيشها  
بحكمة، ماشي بحزن.

تولي فترة بناء، مشي قبر أحلامك. تولي  
طريق تعرف فيها روحك.

وتقول:

"أنا نكفي، وحتى لو ما كان حتى واحد،  
نكمل."

عندك الحق تحس روحك وحدك... بصح  
راك مش وحدك كما تحس!

راك مع روحك، مع ربي، ومع كل واحد  
يقرا هاد السطور ويقول:

"وأخيرًا... كائن اللي فهمني!"

## عندك الحق تحنّ بصرح

ما ترجعش للي خلاك فوسط العاصفة وحدك!

آه القلب... ما يسمعش للعقل.

يحنّ، حتى للي وجّعو.

يحنّ، حتى للي خلى الجرح مفتوح  
ومشى.

يحنّ، ويقول: "يمكن يرجع؟ يمكن تغير؟  
يمكن أنا اللي غلّطت؟"

عندك الحق تحنّ...

تشّتاّق للذكريات، للأيام، للصوت،  
للضحكة اللي كانت تداوي، بصرح لازم  
تعرف بلي: اللي خلاك في عز الوجع، ما  
كانش خايف على قلبك!

اللي سمح يروح وانت تتكسر، ما كانش  
يستاهل تبني عليه حياة!

نعم، تحنّ... بس ما تبعيش كرامتك في  
سوق الذكريات، ما تفتحش باب كان  
سبب دموعك، ما تردّش روحك رهينة  
"واش كان".

خاطر اللي يحبك ما يخليكش، واللي  
خلي... خلاك بقلب بارد!

ماشي كل رجوع "نية طيبة"، مرات  
الرجوع سمّ، مغلف بالحب، يعاود  
يكسرك بطريقة جديدة، ويخليك تقول:  
"يا ريت ما رجعتش!"

خلي اللي راح... في الماضي، وخلي  
قلبك يتداوى بالوقت، ماشي بالرجوع  
لمصدر الألم!

راك تستاهل حب ما يخلّيكش، ما  
ينقضش وعدو، ما يخلّيكش تحس  
روحك ثقیل، ولا عبء، ولا "خيار  
مؤقت".

راك تستاهل قلب ييني، ماشي يهدم  
ويروح.

عندك الحق تحنّ... بصح ما ترجعش  
للي خلاك فوسط العاصفة وحدك!



عندك الحق تحس بلى ناقص...

بصح راك كافي وأكثر!

مرات تشوف المراية، وما تعجبكش  
صورتك.

تشوف تعبك، وتقول: "راني نجري بلا  
فايدة..."

تشوف اللي وصلوا...

وتشوف روحك مازلت تتحرّك بشويّة،  
وتحس بلى كلشي فيك ناقص: شكك،  
مستواك، كلامك، وجودك، وحتى  
ضحكتك.

آه يا قلبي...

راهي الدنيا علّمتك تقارن، ورّاتك بلي  
لازم تكون نسخة من نموذج معين باش  
تتقبل، باش يحبّوك، باش ما يضحكوش  
عليك، باش يقولوا: "هادا ناجح...  
وهادي تاع قيمة."

بصح خليني نقولك:

راك كافي...

بضحكتك اللي تجي من القلب، بعيونك  
اللي تتغرّق بالدموع وتمسحهم وحدك،  
بكلماتك اللي تخاف تقولها، بصمتك اللي  
فيه ألف قصة، راك كافي لأنك نقي،  
حقيقي، مشي مزيف.

النقص الحقيقي؟

هو كي تولي نسخة من غيرك، وتنسى  
روحك!

هو كي تحاول ترضي العالم... وتنسى  
ترضي ربك ونفسك.

هو كي تعيش عمرك كامل تحاول تثبت  
بلي تستاهل، وانت أصلاً... خلقت  
تستاهل

عيوبك؟ زينة.

ترددك؟ إنسانية.

بطئك؟ حكمة.

تعبك؟ شهادة.

سكوتك؟ عمق.

وقلبك؟ جوهرة...

عندك الحق تحس بلي ناقص... بصح  
راك كافي وأكثر!

كافي باش تحب، باش تحلم، باش تغيّر،  
باش تبدأ من جديد، كافي باش توقف،  
وتشوف السما وتقول: "ربي خلقتي، إذاً  
أنا ماشي عبث "

## عندك الحق تنسى...

### بصح واش ذنب الطفولة تُمحي؟

كبرنا.

في زحمة الوقت، في ضغط المسؤولية،  
في الوجوه اللي لازم نرضيوها، في  
الطرق اللي لازم نتجحو فيها، نسينا  
الطفل اللي فينا.

نسينا البكاء اللي خبينااه تحت الغطاء،  
نسينا اللعب اللي كنا نحلم نكمله، نسينا  
الحضن اللي تمنينااه، وما جاش.

نسينا الرسومات اللي ما تفهمهاش  
الدنيا، بس كانت عالما الآمن!

نسينا كيفاش كنا نغني وحدنا في  
الزاوية، نرسم قلوب على الدفاتر،

ونكتب أسامي ناس رحلوا، نسينا كيفاش  
كنا نخاف من الظلمة...

بصح نخبي الخوف، خاطر قالولنا: "ما  
تبكيش ... راك كبير!"

كبرنا غصب...

بسرعة!

تعلمنا نكذب على الحنين

نضحك باش ما يسألوش،

نسكت باش ما يعايروش

وننسى باش ما يوجعناش.

بس الطفولة ما ماتتش! راهي ساكنة في

كل تنهيدة، في كل دمة كي نتفكر وقت

قالولنا: "ماکش مهم، روح من هنا!"

في كل مرة نحس فيها بلي ما  
نستاهلوش الحب... راهي الطفولة اللي  
داخلك تصيح: "أنا كنت نستاهل...  
علاش ما شفتونيش؟!"

عندك الحق تنسى، بصح لو سمحت...  
ارجع لطفلك الداخلي، عانقو، أسمعو.  
قوله: "راني معاك اليوم، وما نخليش  
فيك كيما خلاوني."

أعطيه الحنان اللي ما جاش، الفرحة  
اللي تحرمت، والأمان اللي كان يحلم  
بيه... وما لقاوش!

عندك الحق تنسى... بصح واش ذنب  
الطفولة تُمحي؟

الخاتمة

يا عزيزي القارئ، إذا وصلتني لهذا  
السطور، فمعنى ذلك أنك عشت معايا،  
فكرت معايا، وقلبي قلبك حالي.

قدرت تحس بكل كلمة، بكل جرح، بكل  
لحظة ألم أو شك، لكن المهم أنك في  
الأخير قدرت ترفع راسك. عندك الحق  
تحس بلي الدنيا ظالمة، تحس بلي  
وحدك، تحس بلي ما فهموكش لكن في  
النهاية، راك مش وحدك. راك مثلنا  
كامل، عشت، تعبت، ونجحت رغم كل  
شيء. ما تخلّيش لحظة ضعف تأخذ منك  
الأمل، لأن القوة جاية من داخلك. عندك  
الحق تبكي، عندك الحق تخاف، لكن  
عندك الحق تزيد تقوى وتكمل. كل كلمة



في هذا الكتاب كانت هديّة لك، كانت  
تذكير بلي مهما كانت حياتك، أنت قادر  
تكتب فصل جديد فيها. ما تعيشش في  
الماضي، لا تعيشش في الغلطات اللي  
فانت... أنت اليوم أقوى، وأنت اليوم  
قادر، ما تخليش الناس تحطّمك، ما  
تخليش الجروح تكسرك، لأنك أنت أكبر  
من كل شيء. أنت تستاهل الخير،  
تستاهل الفرحة، تستاهل تحيا حياتك  
بالطريقة اللي تحبها. أنا هنا معاك بكل  
كلمة كتبتها، وكل إحساس عشته، وكل  
فكرة حظيتها بين هاذ الصفحات لأنك  
تستاهل تشوف نفسك أقوى مما كنت  
عليه، عندك الحق تكون سعيد، عندك  
الحق تفرح، وعندك الحق تحلم.

وفي الأخير، نقدر نقول لك: عيش كما  
تحب، ولكن خلي قلبك دائماً نقي لأنك  
تستاهل كل شيء جميل.

\_عندك الحق تخاف... بصح ما تعيشش  
عبد للخوف!

\_عندك الحق تشك في روحك... بصح ما  
تطيحش قيمتك بعينيك!

\_عندك الحق تحس روحك وحدك... بصح  
راك مش وحدك كما تحس!

\_عندك الحق تحنّ... بصح ما ترجعش للي  
خلاك فوسط العاصفة وحدك!

\_عندك الحق تحس بلي ناقص... بصح  
راك كافي وأكثر!

\_عندك الحق تنسى... بصح واش ذنب  
الطفولة ثمحي؟

\_الخاتمة.